

# ალგორითმები და მონაცემთა სტრუქტურები

## მაქსიმუმის მოძებნა. ანალიზი.

ზ. კუჭავა, L<sup>A</sup>T<sub>E</sub>X

**ამოცანა** : რიცხვით მასივში  $A[n] = A[a_0, \dots, a_{n-1}]$  მოვძებნოთ მაქსიმალური ელემენტი და გამოვიტანოთ შესაბამისი (უდიდესი) ინდექსი. [1]96-104გვ, [2]114-122გვ


## 1 მარტივი მოძებნა

### 1.1 ალგორითმი

განვიხილოთ ინდექსი  $i = n - 1$ . შემოვიტანოთ დამხმარე ცვლადი  $Max$  და მივანიჭოთ  $a_{n-1}$  მნიშვნელობა,  $Max = a_{n-1}$ . ცვლადს  $Index$  მივანიჭოთ  $n - 1$  მნიშვნელობა,  $Index = n - 1$ . შევამციროთ ინდექსი  $i = i - 1$  და შევამოწმოთ ხომ არ გახდა  $i$  უარყოფითი. თუ კი ამოცანა დასრულებულია. თუ არა, შევადაროთ  $Max$  მასივის ელემენტს  $a_i$ -ს. თუ  $a_i > Max$ , მაშინ შევცვალოთ ცვლადები ახალი მნიშვნელობებით  $Max = a_i$  და  $Index = i$  და გადავიდეთ ინდექსის შემცირების საფეხურზე. რადგან გამოვიყენეთ მკაცრი უტოლობა, ამიტომ ალგორითმი პოულობს ყველაზე მარჯვენა მაქსიმუმს ანუ მასივის ელემენტებში მაქსიმალურ მნიშვნელობას უდიდესი ინდექსით.

## 1.2 ბლოგსქემა

სურათი 1



სურ. 1: მარტივი მოძებნა

### 1.3 ფსევდოკოდი

კოდი, რომელიც ზუსტად შეესაბამება ბლოკსქემას და ამდენად იყენებს ე.წ. goto კონსტრუქციას შემდეგია:

```
1      i = n - 1;
2      MAX = a[i];
3      INDEX = i;
4  LOOP: i = i - 1;
5      if(i < 0 )
6      {
7          return INDEX;
8      }
9      else
10     {
11         if(MAX < a[i])
12         {
13             MAX = a[i];
14             INDEX = i;
15         }
16         goto LOOP;
17     }
```

ციკლის კონსტრუქციის გამოყენებით

```
1      i = n - 1;
2      MAX = a[i];
3      INDEX = i;
4      for(i = n-2; i >= 0; i--)
5      {
6          if(MAX < a[i])
7          {
8              MAX = a[i];
9              INDEX = i;
10         }
11     }
12     return INDEX;
```

## 1.4 ანალიზი 4 ელემენტის შემთხვევისთვის.

განვიხილოთ შემთხვევა როდესაც მაქსიმუმს ვეძებთ ოთხ განსხვავებულ  $(a, b, c, d)$  რიცხვებს შორის. ასევე, დავუშვათ, რომ რიცხვების რაოდენობა შემოსაზღვრულია, მაგალითად, მათთვის გამოყოფილი ველის სიგრძის მიხედვით. ანუ, თუ საუბარია, მაგალითად, 32 ბიტის რიცხვებზე, მაშინ სულ გვაქვს განსხვავებული  $2^{32} = 4\,294\,967\,296$  რიცხვი.

ალგორითმის ფსევდოკოდი


```
1 largest = a;
2 if(largest < b)
3     largest = b;
4 if(largest < c)
5     largest = c;
6 if(largest < d)
7     largest = d;
8 return largest;
```

აღვნიშნოთ მინიჭებათა რაოდენობის სირთულის ფუნქცია  $T$  ასოთი. ალგორითმის შესრულების დროს მინიჭებების რაოდენობა შეიძლება იყოს 1-დან 4-ის ჩათვლით ნებისმიერი მთელი რიცხვი. ცხადია, რომ ერთი მინიჭება ხდება ყოველთვის, ხოლო მინიჭებათა მაქსიმალური რაოდენობაა  $T = 4$ .

მაქსიმუმის მინიჭებათა საშუალო რაოდენობის გამოთვლისთვის ჯერ განვიხილოთ სიმრავლე  $A$  ისეთი ოთხეულების, რომლებისთვისაც მაქსიმუმი პირველ ადგილზეა. ანუ  $A = \{(max, *, *, *)\}$  სადაც პირველ პოზიციაში არის ოთხ რიცხვს შორის მაქსიმუმი და დანარჩენ ადგილებზე მდგომი რიცხვები აღნიშნულია  $*$ -ით. ასევე განვიხილოთ სიმრავლე  $B$  ისეთი ოთხეულების, რომლებისთვისაც მაქსიმუმი მეორე ადგილზეა. ანუ  $B = \{(*, max, *, *)\}$  სადაც მეორე პოზიციაში არის ოთხ რიცხვს შორის მაქსიმუმი და დანარჩენ ადგილებზე მდგომი რიცხვები აღნიშნულია  $*$ -ით. დაშვების თანახმად  $A$  და  $B$  სიმრავლეებს არა აქვთ საერთო ელემენტი, ანუ  $A \cap B = \emptyset$ .

ვაჩვენოთ, რომ  $A$  ელემენტების რაოდენობა, რომელსაც აღვნიშნავთ  $|A|$ -თი, ტოლია  $B$  სიმრავლეში ელემენტების რაოდენობის, ანუ  $|A| = |B|$ . ამისთვის შევნიშნოთ, რომ  $|B|$  არაა ნაკლები  $|A|$ -ზე, რადგან ყოველი  $A$ -ს ელემენტიდან  $(max, *, *, *)$  შეიძლება მივიღოთ  $B$ -ს ოთხეული  $(*, max, *, *)$  პირველ პოზიციაში მდგომ  $max$  რიცხვისთვის და მეორე პოზიციაში მდგომი რიცხვისთვის ადგილების გაცვლით. ე.ი.  $|A| \leq |B|$ . ანალოგიური მსჯელობით მივიღებთ  $|B| \leq |A|$ , ანუ  $|A| = |B|$ .

ამდენად, შეიძლება ვთქვათ, რომ ყველა შესაძლო ოთხეულთა შორის იმ ოთხეულების რაოდენობა, რომელთათვის მაქსიმუმია  $a$  არის მთელი რაოდენობის  $\frac{1}{4}$ . იგივე იქნება  $b, c$  და  $d$ -ის.



სურ. 2: წრიული დიაგრამა.


დავთვალოთ ყველა შესაძლებელი ოთხეულების რომელი წილები შეესაბამება  $T$ -ს განსხვავებულ მნიშვნელობებს.

განვიხილოთ ჯერ ოთხეულები სადაც  $a$  არის მაქსიმუმი. ყველა ასეთი ოთხეულებისთვის და მხოლოდ მათთვის გვექნება ერთი მინიჭება და ამგვარად წილიც იქნება  $\frac{1}{4}$ .

ოთხეულები სადაც  $b$  არის მაქსიმუმი მოხვდებიან მხოლოდ 2 მინიჭების შემთხვევაში და შექმნიან ამ ჯგუფში პირველ შესაგრებს  $\frac{1}{4}$ -ს.

ოთხეულებისთვის სადაც  $c$  არის მაქსიმუმი შეიძლება გვქონდეს 2 მინიჭება იმ შემთხვევაში როდესაც  $a > b$  და სამი მინიჭება როდესაც  $b > a$ . ზევით განხილული  $A$  და  $B$  სიმრავლეების ელემენტთა რაოდენობის ტოლობის დამტკიცების ანალოგიურად მივიღებთ, რომ მაშინაც როდესაც  $c$  არის მაქსიმუმი ისეთი ოთხეულების, რომლებისთვისაც სრულდება  $a < b$ , იმდენივეა რამდენიც ოთხეულების, რომლებისთვისაც სრულდება  $b > a$ , ანუ ორივე არის  $\frac{1}{4} \cdot \frac{1}{2}$  ნაწილი.

ბოლოს განვიხილოთ ოთხეულები სადაც  $d$  არის მაქსიმუმი. ასეთი ოთხეულების მინიჭებათა რაოდენობა შეიძლება იყოს 2, 3 და 4. თუ მივიღებთ, რომ ყოველი უტოლობა მოსალოდნელობას თანაბრად ყოფს, ყოველ შემთხვევას შესვდება  $\frac{1}{4} \cdot \frac{1}{2} \cdot \frac{1}{2}$  წილი.



ამგვარად მინიჭების სირთულის ფუნქციისთვის მნიშვნელობები და სიხშირეები იქნება:

$$T(a, b, c, d) = \begin{cases} 1: & \frac{1}{4} & = \frac{4}{16} \\ 2: & \frac{1}{4} + \frac{1}{4} \cdot \frac{1}{2} + \frac{1}{4} \cdot \frac{1}{2} \cdot \frac{1}{2} & = \frac{7}{16} \\ 3: & \frac{1}{4} \cdot \frac{1}{2} + \frac{1}{4} \cdot \frac{1}{2} \cdot \frac{1}{2} + \frac{1}{4} \cdot \frac{1}{2} \cdot \frac{1}{2} & = \frac{4}{16} \\ 4: & \frac{1}{4} \cdot \frac{1}{2} \cdot \frac{1}{2} & = \frac{1}{16} \end{cases} \quad (1)$$

მინიჭების სირთულის ფუნქციის საშუალო იქნება:

$$ET = 1 \cdot \frac{4}{16} + 2 \cdot \frac{7}{16} + 3 \cdot \frac{4}{16} + 4 \cdot \frac{1}{16} = 2 \frac{1}{8} = 2.125 \quad (2)$$

როგორც ვხედავთ მიღებული საშუალო ანუ მოსალოდნელი მნიშვნელობა კარგი მიახლოებაა ყველაზე ხშირი შემთხვევისთვის, როდესაც სირთულის ფუნქცია უდრის 2-ს.

**თანაბარი განაწილების შემთხვევა.** ახლა წარმოვიდგინოთ, რომ 1.4 ამოცანისთვის არ ჩავატარეთ წილების ზუსტი გამოთვლა და ავიღეთ წილები თანაბარი ანუ ე.წ. თანაბარი განაწილება. რადგან მინიჭებათა სირთულის ფუნქციისთვის სულ ოთხი განსხვავებული მნიშვნელობა გვაქვს, ეს ნიშნავს, რომ თითოეულს შევუსაბამებთ წილს/ალბათობას  $\frac{1}{4}$ . სირთულის ფუნქციის საშუალო იქნება:

$$ET = 1 \cdot \frac{1}{4} + 2 \cdot \frac{1}{4} + 3 \cdot \frac{1}{4} + 4 \cdot \frac{1}{4} = 2.5$$

ასეთი მიახლოება არ გვაძლევს საშუალებას არჩევანი გაგაკეთოთ სირთულის ფუნქციის მნიშვნელობებს 2-სა და 3-ს შორის.

## 1.5 ანალიზი $n$ ელემენტის შემთხვევაში.

ნებისმიერი შემავალი მონაცემებისთვის შედარებათა რაოდენობა უცვლელია და იცვლება მხოლოდ მაქსიმუმის მინიჭებათა რაოდენობა. ამდენად ანალიზის შესწავლის საგანია მაქსიმუმის შეცვლათა რაოდენობა. სიმარტივისთვის ანალიზი ჩავატაროთ ჯერ შემთხვევისთვის როდესაც მასივის ელემენტები ურთიერთგანსხვავებულია.

### 1.5.1 საუკეთესო შემთხვევა

როდესაც მასივის მაქსიმალური ელემენტი განლაგებულია  $n-1$  პოზიციაში, მაშინ მაქსიმუმის შეცვლათა რაოდენობა 0-ია.

### 1.5.2 უარესი შემთხვევა

როდესაც მასივი დალაგებულია კლებადობით, ანუ მაქსიმალური პირველი ელემენტია, მაშინ მაქსიმუმის შეცვლათა რაოდენობა  $n-1$ -ია.

### 1.5.3 საშუალო შემთხვევა

გამოვიყვანოთ ფორმულა მაქსიმუმის შეცვლათა რაოდენობისთვის ნაბიჯ-ნაბიჯ და დავიწყოთ  $n=2$ -დან. მასივისთვის  $A[2] = A[a_0, a_1]$  გვაქვს სულ ორი შესაძლო შემთხვევა:

$$\begin{aligned} a_0 &< a_1 \\ a_1 &< a_0 \end{aligned} \tag{3}$$

პირველ შემთხვევაში მაქსიმუმის შეცვლათა რაოდენობა არის 0 და მეორეში 1. თუ  $S(2)$ -ით აღვნიშნავთ მაქსიმუმის შეცვლათა რაოდენობას  $n=2$ -ის, გვექნება  $S(2) = 1$ .

$n=3$  შემთხვევისთვის  $A[3] = A[a_0, a_1, a_2]$  გვაქვს  $6 = 3!$  განსხვავებული ვარიანტი და განვიხილოთ ისინი შემდეგ 3 ჯგუფად:

$$\begin{aligned} a_0 &< a_1 < a_2 \\ a_0 &< a_2 < a_1 \end{aligned} \tag{4}$$

$$\begin{aligned} a_1 &< a_0 < a_2 \\ a_1 &< a_2 < a_0 \end{aligned} \quad (5)$$

$$\begin{aligned} a_2 &< a_0 < a_1 \\ a_2 &< a_1 < a_0 \end{aligned} \quad (6)$$

თუ შევხედავთ მხოლოდ მარჯვენა უტოლობებს დავინახავთ, რომ ჯგუფებში 4 და 5 გვაქვს ზუსტი ანალოგია 3 შემთხვევის - განსხვავება მხოლოდ ისაა, რომ 4-ში აღებულია ინდექსი 1 ინდექსი 0-ის ადგილას და ინდექსი 2 ინდექსი 1-ის ადგილას, ხოლო 5-ში აღებულია ინდექსი 2 ინდექსი 1-ის ადგილას.

ამგვარად ჯგუფებში 4 და 5-ის გვექნება თითოეულში თითო ინდექსის შეცვლა.

ჯგუფ 6-ში, რადგან  $a_2$  მინიმალურია, ამიტომ ყოველი სტრიქონი აუცილებლად გამოიწვევს მინიმუმ ერთ მაქსიმუმის შეცვლას, ანუ იმდენ შეცვლას რამდენი სტრიქონიცაა  $= 2!$  ამ შემთხვევაში. მაგრამ ასეთი შეცვლის შემდეგ ისევ ავლმონდებით 3-ის ანალოგიურ სიტუაციაში.

ამგვარად ჯგუფში 6 გვექნება მაქსიმუმის 3 შეცვლა.

სულ  $n = 2$  შემთხვევისთვის გამოდის 5 შეცვლა და თუ  $S(3)$ -ით აღვნიშნავთ მაქსიმუმის შეცვლათა რაოდენობას, მაშინ შეგვიძლია ჩავწეროთ ფორმულა

$$S(3) = 3S(2) + 2! \quad (7)$$

განვიხილოთ  $n = 4$  შემთხვევა, ანუ  $A[4] = A[a_0, a_1, a_2, a_3]$ . ცხადია ამ შემთხვევაში გვაქვს  $24 = 4!$  განსხვავებული ვარიანტი და  $n = 3$  შემთხვევის ანალოგიურად განვიხილოთ 4 ჯგუფი, სადაც თითოეულში ფიქსირებული ელემენტია პირველ ადგილას:

$$\begin{array}{llll} a_0 < a_1 < a_2 < a_3 & a_1 < a_0 < a_2 < a_3 & a_2 < a_0 < a_1 < a_3 & a_3 < a_0 < a_1 < a_2 \\ a_0 < a_1 < a_3 < a_2 & a_1 < a_0 < a_3 < a_2 & a_2 < a_0 < a_3 < a_1 & a_3 < a_0 < a_2 < a_1 \\ a_0 < a_2 < a_3 < a_1 & a_1 < a_2 < a_3 < a_0 & a_2 < a_1 < a_0 < a_3 & a_3 < a_1 < a_0 < a_2 \\ a_0 < a_2 < a_1 < a_3 & a_1 < a_2 < a_0 < a_3 & a_2 < a_1 < a_3 < a_0 & a_3 < a_1 < a_2 < a_0 \\ a_0 < a_3 < a_2 < a_1 & a_1 < a_3 < a_0 < a_2 & a_2 < a_3 < a_0 < a_1 & a_3 < a_2 < a_0 < a_1 \\ a_0 < a_3 < a_1 < a_2 & a_1 < a_3 < a_2 < a_0 & a_2 < a_3 < a_1 < a_0 & a_3 < a_2 < a_1 < a_0 \end{array} \quad (8)$$

პირველი 3 ჯგუფის ყოველი მარჯვენა სამი სვეტი ზუსტად იმეორებს  $n = 3$  შემთხვევას ანუ თითოეულში არის  $S(3)$  მაქსიმუმის შეცვლათა რაოდენობა. ხოლო მეოთხე ჯგუფში  $a_3$  მინიმალურია და ამიტომ მაქსიმუმის 1 შეცვლა მოხდება ყოველ სტრიქონში ე.ი. აუცილებლად გვექნება  $6 = 3!$  მაქსიმუმის შეცვლა. მაგრამ ამის შემდეგ მივიღებთ ზუსტად (2) – (3) – (4) სიტუაციას, რომლისთვისაც მაქსიმუმის შეცვლათა რაოდენობა არის  $S(3)$ .

ამგვარად  $n = 4$ -ის მაქსიმუმის შეცვლათა რაოდენობის ფორმულა მიიღებს სახეს:

$$S(4) = 4S(3) + 3! \quad (9)$$

ანალოგიური მსჯელობა სამართლიანია ზოგადად  $n - 1$ -დან  $n$ -ზე გადასვლის შემთხვევაშიც.

ზოგადი ფორმულა იქნება:

$$S(n) = n \cdot S(n - 1) + (n - 1)! \quad (10)$$

აქედან ადვილია ზოგადი  $n$ -ის (არა რეკურენტული) ფორმულის მიღება:



$$\begin{aligned}
S(n) &= n \cdot S(n-1) + (n-1)! = \\
&= n \cdot [(n-1)S(n-2) + (n-2)!] + (n-1)! = \\
&= n(n-1)S(n-2) + n \cdot (n-2)! + (n-1)! = \\
&= n(n-1)S(n-2) + \frac{n!}{n-1} + \frac{n!}{n} = \\
&= \dots = \\
&= n(n-1)(n-2) \cdot \dots \cdot 3 \cdot S(2) + \frac{n!}{3} + \frac{n!}{4} + \dots + \frac{n!}{n-1} + \frac{n!}{n} = \\
&= \frac{n!}{2} + \frac{n!}{3} + \frac{n!}{4} + \dots + \frac{n!}{n-1} + \frac{n!}{n} = n! \cdot \left( \frac{1}{2} + \frac{1}{3} + \frac{1}{4} + \dots + \frac{1}{n-1} + \frac{1}{n} \right)
\end{aligned} \tag{11}$$

მასივისთვის  $A[n] = A[a_0, \dots, a_{n-1}]$  გვაქვს  $n!$  დალაგება ურთიერთგანსხვავებული რიცხვების. თუ ჩავთლით, რომ ყოველი დალაგების ვარიანტი ერთნაირად მოსალოდნელია, გამოდის, რომ მოსალოდნელობის ზომა თითოეულისთვის იქნება  $\frac{1}{n!}$ . მაშინ მაქსიმუმის შეცვლათა რაოდენობის საშუალო დაითვლება ფორმულით

$$\frac{S(n)}{n!} = \frac{1}{2} + \frac{1}{3} + \frac{1}{4} + \dots + \frac{1}{n-1} + \frac{1}{n} = \sum_{i=1}^n \frac{1}{i} - 1 \tag{12}$$

მიღებული ჯამი ცნობილია **ჰარმონიული ჯამის** ([1]75გვ.) სახელით და ალგორითმების ანალიზში მისთვის გვაქვს სპეციალური აღნიშვნა

$$\mathcal{H}_n = 1 + \frac{1}{2} + \frac{1}{3} + \frac{1}{4} + \dots + \frac{1}{n-1} + \frac{1}{n} = \sum_{i=1}^n \frac{1}{i} \tag{13}$$

ჰარმონიული ჯამის ერთერთი მნიშვნელოვანი თვისებაა მისი კავშირი ლოგარითმულ ფუნქციასთან

$$\mathcal{H}_n = \ln n + \gamma + \frac{1}{2n} - \varepsilon_n = \ln n + O(1), n \rightarrow \infty \tag{14}$$

სადაც  $\gamma$  არის ცნობილი ეილერ-მასკერონის (Euler-Mascheroni [3]) კონსტანტა,  $\gamma \approx 0.57721$ , და  $0 \leq \varepsilon_n \leq \frac{1}{8n^2}, n \rightarrow \infty$ .

უკანასკნელი ფორმულის გათვალისწინებით მაქსიმუმის შეცვლათა საშუალო რაოდენობა შეიძლება ჩავწეროთ შემდეგნაირად

$$\frac{S(n)}{n!} = \mathcal{H}_n - 1 = \ln n + O(1), n \rightarrow \infty \tag{15}$$

ამგვარად,  $n$  ელემენტიან  $A[n]$  მასივში მაქსიმუმის შეცვლა საშუალოდ მოგვიწევს დაახლოებით  $\ln n$ -ჯერ. ეს ნიშნავს, რომ საუკეთესოს 100 კანდიდატიდან ამოვარჩევთ საშუალოდ 4 პრეტენდენტის გამოცვლის შემდეგ. 10 000 კანდიდატისთვის დაგვჭირდება საშუალოდ 9 პრეტენდენტის გამოცვლა. 2021 წლის ნოემბრის მონაცემებით ([4]) დედამიწაზე დაახლოებით ცხოვრობს 7 900 000 000 ადამიანი - ნებისმიერი ნიშნით მათ შორის საუკეთესოს ვიპოვით საშუალოდ 22 პრეტენდენტის გამოცვლის შემდეგ.

**შენიშვნა.** მაქსიმუმის შეცვლათა რაოდენობის მაგივრად, რომ შეგვესწავლა მინიჭებათა რაოდენობა, მაშინ 11 ფორმულაში  $S(n)$ -ს დაემატებოდა კიდევ  $n!$  მინიჭება, ანუ  $S^*(n) = S(n) + n!$ , სადაც  $S^*$  მინიჭებათა რაოდენობაა. ამდენად მინიჭებათა საშუალო რაოდენობა გამოდის

$$\frac{S^*(n)}{n!} = \mathcal{H}_n \quad (16)$$

#### 1.5.4 ჰარმონიული ჯამის ფორმულის (14) დამტკიცება

დამტკიცებას დავაფუძნებთ ცნობილ ზღვარზე  $\lim_{n \rightarrow \infty} (1 + \frac{1}{n})^n = e$ , რომელიც ხშირად მიიღება როგორც  $e$ -ს, ე.წ. ნეპერის რიცხვის, განმარტება. განვიხილოთ მიმდევრობა  $y_n = (1 + \frac{1}{n})^{n+1}$ . ერთი მხრივ ცხადია, რომ  $\lim_{n \rightarrow \infty} y_n = \lim_{n \rightarrow \infty} (1 + \frac{1}{n})^{n+1} = e$ . მეორე მხრივ, უტოლებებიდან

$$\frac{y_n}{y_{n-1}} = \frac{(1 + \frac{1}{n})^{n+1}}{(1 + \frac{1}{n-1})^n} = \frac{1}{(1 + \frac{1}{n^2-1})^n} \cdot \frac{n+1}{n} < \frac{1}{1 + \frac{n}{n^2-1}} \cdot \frac{n+1}{n} < 1$$

ჩანს, რომ  $y_n$  კლებადია, ამდენად მეტია თავის ზღვარზე ე.ი. სრულდება  $e < (1 + \frac{1}{n})^{n+1} = y_n$ . უკანასკნელი უტოლობა ტოლფასია უტოლობის  $\frac{1}{n+1} - \ln(1 + \frac{1}{n}) < 0$  (a).

ახლა განვიხილოთ მიმდევრობა  $x_n = 1 + \frac{1}{2} + \frac{1}{3} + \dots + \frac{1}{n} - \ln n = \sum_{i=1}^n \frac{1}{i} - \ln n$ . რადგან  $x_{n+1} - x_n = \frac{1}{n+1} - \ln(1 + \frac{1}{n}) < 0$  მიღებული (a) უტოლობის მიხედვით, ამიტომ  $x_n$  კლებადია. მეორე მხრივ მიმდევრობა  $x_n$  შემოსაზღვრულია ქვემოთ:

$$\begin{aligned} x_n &= 1 + \frac{1}{2} + \dots + \frac{1}{n} - \ln n > \ln\left(1 + \frac{1}{1}\right) + \ln\left(1 + \frac{1}{2}\right) + \dots + \ln\left(1 + \frac{1}{n}\right) - \ln n = \\ &= \ln\left(2 \cdot \frac{3}{2} \cdot \frac{4}{3} \dots \frac{n+1}{n} \cdot \frac{1}{n}\right) = \ln \frac{n+1}{n} > \frac{1}{n+1} > 0 \end{aligned}$$


ამიტომ მიმდევრობას  $x_n$  გააჩნია ზღვარი, რომელიც აღვნიშნოთ  $\gamma$ -თი.

მაშინ გვექნება  $1 + \frac{1}{2} + \frac{1}{3} + \dots + \frac{1}{n} = \sum_{i=1}^n \frac{1}{i} = \gamma + \ln n + \varepsilon_n$  სადაც  $\varepsilon_n \rightarrow 0, n \rightarrow \infty$ .

#### 1.5.5 (1.4) და (1.5) მეთოდების შედარება

4 ელემენტში მაქსიმუმის მოძებნის ანალიზის დროს (2) ფორმულიდან ვნახეთ, რომ მინიჭებათა სირთულის ფუნქციის საშუალო მნიშვნელობა არის 2.125-ის ტოლი. ამავე დროს (16) ფორმულით მიღებული გვაქვს მინიჭებათა სირთულის ფუნქციის საშუალო მნიშვნელობა  $n$  ელემენტისთვის. ბუნებრივია ველოდეთ, რომ ორმა ფორმულამ ერთნაირი შედეგი უნდა მოგვცეს, თუ ავიღებთ  $n = 4$ -ს (15)-ში. მაგრამ თუ

$$\frac{S^*(4)}{4!} = \mathcal{H}_4 = 1 + \frac{1}{2} + \frac{1}{3} + \frac{1}{4} = \frac{25}{12} = 2.08(3) \quad (17)$$



სურ. 3: წრიული დიაგრამა.

ან კიდევ სხვანაირად

$$\frac{S(4)}{4!} = \ln 4 + \gamma + \frac{1}{2 \cdot 4} - \varepsilon_4 - 1 \approx$$

$$\approx 1.386294361 + 0.57721 + 0.125 - 1 - \varepsilon_4 \approx 1.088504361$$

და ეს ორი შედეგი კარგად ეთანხმება ერთმანეთს, მაშინ განსხვავება 2.125-თან აშკარად გამოკვლევას მოითხოვს.

საქმე იმაშია, რომ 1.4 და 1.5 დათვლილები არიან სხვადასხვა მოსალოდნელობებისთვის. რადგან 1-ში განაწილება უკვე მიღებული გვაქვს, შევისწავლოთ 1.5-ის შესაბამისი განაწილება  $n = 4$  ელემენტისთვის. მსჯელობა ჩავატაროთ, ისევე როგორც 2-ის იმ განსხვავებით, რომ ამ შემთხვევაში ჩვენ ვთვლით, რომ 4 ელემენტის ყველა შესაძლო  $4! = 24$  დალაგებიდან თითოეულის მოსალოდნელობის ზომა არის  $\frac{1}{4!} = \frac{1}{24}$  3.

ამ შემთხვევაში მინიჭების სირთულის ფუნქციისთვის მნიშვნელობები და სიხშირეები იქნება:

$$T(a, b, c, d) = \begin{cases} 1: & \frac{1}{4} & = \frac{6}{24} \\ 2: & \frac{1}{4} + \frac{1}{4} \cdot \frac{1}{2} + \frac{1}{24} + \frac{1}{24} & = \frac{11}{24} \\ 3: & \frac{1}{4} \cdot \frac{1}{2} + \frac{1}{24} + \frac{1}{24} + \frac{1}{24} & = \frac{6}{24} \\ 4: & \frac{1}{24} & = \frac{1}{24} \end{cases} \quad (18)$$

მინიჭების სირთულის ფუნქციის საშუალო იქნება:

$$ET = 1 \cdot \frac{6}{24} + 2 \cdot \frac{7}{24} + 3 \cdot \frac{6}{24} + 4 \cdot \frac{1}{24} = \frac{50}{24} = 2.08(3) \quad (19)$$

რაც ეთანხმება 17-ს.

## 2 საშუალო არათანაბარი მოსალოდნელობის პირობებში

დავუშვათ, რომ მაქსიმალური ელემენტის პირველივე ნაბიჯზე პოვნის მოსალოდნელობა არ არის თანაბარი ყველა სხვა შესაძლო ვარიანტთან და არის, მაგალითად,  $\frac{1}{2}$ .

როგორც ვიცით  $n$  ელემენტიან  $A[n]$  მასივში, ურთიერთგანსხვავებული ელემენტების შემთხვევაში, ელემენტების დალაგების ყველა შესაძლო ვარიანტების რაოდენობაა  $n!$ . აქედან ვარიანტების რაოდენობა, სადაც  $a_{n-1}$  არის მაქსიმალური არის  $(n-1)!$ . განსხვავებულად არჩეულ შემთხვევაში ყოველი მათგანის მოსალოდნელობის ზომა გამოდის  $\frac{1}{2 \cdot (n-1)!}$ . რჩება  $n! - (n-1)! = (n-1) \cdot (n-1)!$  ვარიანტი და თითოეულისთვის მოსალოდნელობის ზომა იქნება  $\frac{1}{2 \cdot (n-1) \cdot (n-1)!}$ .

თუ შევნიშნავთ, რომ (11) ფორმულაში მაქსიმუმის შეცვლათა რაოდენობა ყველა იმ შემთხვევისთვის, როდესაც  $a_{n-1}$  არის მაქსიმალური წარმოადგენს 0-ს, მაშინ გამოვა, რომ (11) ფორმულა ფაქტიურად გვაძლევს მაქსიმუმის შეცვლათა რაოდენობას იმ შემთხვევებისთვის, სადაც  $a_{n-1}$  არ არის მაქსიმალური.

ამგვარად საშუალო დაითვლება ფორმულით:

$$\begin{aligned} \frac{1}{2 \cdot (n-1) \cdot (n-1)!} \cdot S(n) &= \frac{n!}{2 \cdot (n-1) \cdot (n-1)!} \cdot \left( \sum_{i=1}^n \frac{1}{i} - 1 \right) = \\ &= \frac{n}{2(n-1)} \left( \ln n + O(1) \right) = \frac{\ln n}{2} + O(1), n \rightarrow \infty \end{aligned} \quad (20)$$

როგორც მოსალოდნელი იყო მაქსიმუმის შეცვლათა რაოდენობა საშუალოდ განსხვავდება.

## ლიტერატურა

- [1] Donald Ervin Knuth, *The Art of Computer Programming*, Volume 1, Third Edition
- [2] Thomas H. Cormen Charles E. Leiserson Ronald L. Rivest Clifford Stein , *Introduction to Algorithms*, Third Edition
- [3] Euler-Mascheroni
- [4] world-population